

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON  
O BORAVIŠNOJ TAKSI FEDERACIJE BOSNE I HERCEGOVINE**

**Sarajevo, juni 2022. godine**

**ZAKON**  
**O BORAVIŠNOJ TAKSI FEDERACIJE BOSNE I HERCEGOVINE**

**I. OPĆE ODREDBE**

**Član 1.**  
**(Predmet Zakona)**

Ovim zakonom uređuju se: osnovni pojmovi u vezi sa boravišnom taksom, obaveza plaćanja boravišne takse, obveznici i način plaćanja boravišne takse, visina boravišne takse, naplata, uplata i raspodjela sredstava od boravišne takse, nadzor, kaznene odredbe, te prijelazne i završne odredbe.

**Član 2.**  
**(Osnovni pojmovi)**

Pojmovi koji se koriste u ovom zakonu imaju sljedeće značenje:

- a) **Boravišna taksa** je naknada za korištenje turističke, komunalne i saobraćajne infrastrukture i suprastrukture na području jedinice lokalne samouprave ili u turističkom mjestu koju plaća domaći ili strani državljanin koji izvan svog mjesta prebivališta koristi uslugu noćenja u ugostiteljskom objektu za smještaj;
- b) **Iznajmljivač** je fizičko lice koje pruža ugostiteljske usluge u vlastitom domaćinstvu i to usluge smještaja u sobi, apartmanu i kući za odmor ili usluge smještaja u kampu koje je dobilo rješenje o odobrenju za pružanje ugostiteljskih usluga u domaćinstvu;
- c) **Turističko mjesto** je organizaciona i funkcionalna cjelina sa formiranom turističkom ponudom, prirodnim vrijednostima, kulturnim dobrima i drugim znamenitostima značajnim za turizam, komunalnom, saobraćajnom i turističkom infrastrukturuom i drugim sadržajima za smještaj i boravak turista na prostoru jedinice lokalne samouprave (općina ili grad);
- d) **Turistička zajednica Federacije Bosne i Hercegovine** je pravno lice osnovano od strane Federacije BiH, upisano u sudski registar koje obavlja djelatnost promocije i unapređivanja turizma (u daljnjem tekstu: Turistička zajednica Federacije BiH),
- e) **Turistička zajednica kantona** je pravno lice osnovano od strane kantona, upisano u sudski registar koje obavlja djelatnost promocije i unapređivanja turizma,
- f) **Turističke zajednice gradova ili općina** su pravna lica osnovana od jedinica lokalne samouprave, upisana u sudski registar koja obavljaju djelatnost promocije i unapređivanja turizma,
- g) **Ugostitelj** je pravno ili fizičko lice koje obavlja ugostiteljsku djelatnost u skladu sa propisima kojima se reguliše oblast ugostiteljstva,
- h) **Ugostiteljski objekti za smještaj** su objekti u kojima se pružaju usluge smještaja, ishrane i pića i druge uobičajene usluge u ugostiteljstvu ili samo usluge smještaja, kao što su: hotel i podvrste hotela, motel, turističko naselje, kamp, pansion, hostel, prenoćište, odmaralište, kuća za odmor, apartman, sobe za iznajmljivanje, seosko domaćinstvo, planinarski dom i drugi objekti za pružanje usluga smještaja.

## **II – OBVEZNICI I NAČIN PLAĆANJA**

### **Član 3. (Obveznici)**

- (1) Domaći ili strani državljanin koji koristi uslugu noćenja u ugostiteljskom objektu za smještaj evidentira se u knjigu gostiju i plaća boravišnu taksu po svakom ostvarenom noćenju.
- (2) Boravišnu taksu plaćaju i vlasnik plovila koje se nalazi na vezu u luci, kada boravi na plovilu i sva lica koja borave na tom plovilu.
- (3) Strani državljani plaćaju boravišnu taksu pod istim uslovima i u istom iznosu kao i domaći državljani.

### **Član 4. (Boravišna taksa kao prihod)**

- (1) Boravišna taksa je prihod Federacije Bosne i Hercegovine (u daljnjem tekstu: Federacije BiH), kantona i jedinice lokalne samouprave koja se raspoređuje Turističkoj zajednici Federaciji BiH, turističkim zajednicama kantona i turističkim zajednicama gradova i općina.
- (2) Ukoliko kantoni, gradovi i općine u skladu sa potrebama i planovima u oblasti turizma nisu u mogućnosti osnovati turističke zajednice, sredstva prikupljena po osnovu boravišne takse, koriste se u skladu sa odredbama člana 12. stav (1) ovog zakona.

### **Član 5. (Oslobađanje plaćanja)**

Boravišnu taksu ne plaćaju:

- a) djeca do 12 godina starosti,
- b) osobe upućene na banjsko i klimatsko liječenje, odnosno specijaliziranu rehabilitaciju od strane nadležne ljekarske komisije,
- c) osobe sa invaliditetom od najmanje 70%, vojni invalidi od prve do pete kategorije, odnosno civilni invalidi rata od prve do pete kategorije, kao i jedan pratilac navedenih osoba,
- d) djeca i omladina sa smetnjama u razvoju koja su potpuno ili djelimično zavisna od pomoći i njege druge osobe, kao i punoljetne osobe sa invaliditetom koje potpuno ili djelimično zavise od pomoći i njege drugih osoba, te osobe u njihovoj pratnji,
- e) učenici, studenti i njihovi pratioci koji organizovano borave u ugostiteljskom objektu za smještaj radi izvođenja škole u prirodi, ekskurzija, sportsko-rekreativnih i drugih aktivnosti, federalnih i regionalnih takmičenja u znanju i vještinama i obavezne nastave po programu nadležnog ministarstva i planu i programu visokoškolske ustanove,
- f) strani državljani koji su po međunarodnim konvencijama i sporazumima oslobođeni plaćanja boravišne takse i strani državljani koji organizovano, preko zvaničnih humanitarnih organizacija, dolaze radi pružanja humanitarne pomoći,

g) sezonski radnici,

h) učenici osnovnih i srednjih škola i studenti koji nemaju prebivalište u općini ili gradu u kojim se obrazuju.

**Član 6.**  
**(Umanjena boravišna taksa)**

Boravišnu taksu umanjenu za 50% plaćaju:

a) osobe od 13 do 18 godina starosti,

b) osobe koje neprekidno borave u objektu za smještaj duže od 30 dana,

c) osobe koje se bave naučno-istraživačkim radom koji doprinosi turističkom razvoju.

**Član 7.**  
**(Ispunjenost uslova za oslobađanje)**

Osobe iz članova 5. i 6. ovog zakona ostvaruju pravo iz navedenih članova ako podnesu dokaz da su ispunjeni uslovi za neplaćanje boravišne takse ili plaćanje boravišne takse u umanjenom iznosu, i to: ličnu kartu, putnu ispravu, člansku kartu, potvrdu škole, odnosno obrazovne ustanove, uputnicu ljekarske komisije i druge slične isprave kojima se dokazuje ispunjenost uslova iz članova 5. i 6. ovog zakona.

**III – VISINA BORAVIŠNE TAKSE**

**Član 8.**  
**(Visina boravišne takse)**

- (1) Do donošenja odluke Vlade Federacije Bosne i Hercegovine (u daljnjem tekstu: Vlada Federacije BiH) visina boravišne takse se utvrđuje u iznosu od 2 KM po svakom ostvarenom noćenju.
- (2) Visinu boravišne takse, u skladu sa stavom (1) ovog člana, na prijedlog Federalnog ministra okoliša i turizma (u daljnjem tekstu: Ministar) utvrđuje Vlada Federacije BiH u prvoj polovini tekuće godine za sljedeću godinu.

**Član 9.**  
**(Uvećanje iznosa boravišne takse)**

- (1) Izuzetno od člana 8. ovog zakona, po okončanju postupka proglašavanja turističkih mjesta u skladu sa propisima iz oblasti turizma, visina boravišne takse utvrđuje se u zavisnosti od razvrstavanja jedinice lokalne samouprave kao turističkog mjesta, tako da se visina boravišne takse kod ugostitelja koji pruža usluge smještaja u turističkom mjestu utvrđuje u rasponu od 2,5 KM do 3 KM po svakom ostvarenom noćenju.
- (2) Visinu boravišne takse iz stava (1) ovog člana, utvrđuje Vlada Federacije BiH na prijedlog Ministra u prvoj polovini tekuće godine za sljedeću godinu.

## **IV – NAPLATA, UPLATA I RASPODJELA BORAVIŠNE TAKSE**

### **Član 10. (Obaveza plaćanja)**

- (1) Sredstva prikupljena po osnovu boravišne takse uplaćuju se na račun javnih prihoda Federacije Bosne i Hercegovine, kantona i jedinice lokalne samouprave i vode se na posebnom namjenskom transakcijskom računu budžeta Federacije BiH.
- (2) Obveznik uplate boravišne takse je ugostitelj koji pruža uslugu smještaja.
- (3) Izuzetno od člana 3. stav (1) ovog zakona, ugostitelji koji pružaju usluge smještaja u kući za odmor, apartmanu, sobi za iznajmljivanje, iznajmljivač, seosko domaćinstvo i planinarski dom plaćaju godišnji paušalni iznos boravišne takse za svaki krevet (ležaj) u ugostiteljskom objektu, odnosno objektu u kojem se pružaju usluge smještaja.
- (4) Paušalni iznos boravišne takse za ugostitelje iz stava (3) ovog člana na prijedlog Ministra utvrđuje Vlada Federacije BiH u prvoj polovini tekuće godine za sljedeću godinu.
- (5) Broj kreveta (ležaja) kod ugostitelja iz stava (3) ovog člana utvrđuje se na osnovu podataka iz Prijave o iznosu obračunatog paušalnog iznosa boravišne takse dostavljene federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici u skladu sa ovim zakonom.
- (6) Obaveza plaćanja godišnjeg paušalnog iznosa boravišne takse na prijedlog Ministra utvrđuje Vlada Federacije BiH u prvoj polovini tekuće godine za sljedeću godinu.

### **Član 11. (Raspodjela sredstava)**

- (1) Sredstva prikupljena po osnovu boravišne takse raspoređuju se tako što:
  - a) 80% sredstava pripada budžetu jedinice lokalne samouprave,
  - b) 10 % sredstava pripada budžetu kantona,
  - c) 10% sredstava pripada budžetu Federacije BiH.
- (2) Jedinica lokalne samouprave, kanton i Federacija BiH su obavezni da odrede račun posebnih namjena na koji će se doznačavati sredstva boravišne takse.

### **Član 12. (Upotreba sredstava)**

- (1) Sredstva prikupljena po osnovu boravišne takse, isključivo se koriste za:
  - a) realizaciju programskih aktivnosti na promociji i unapređenju turizma, razvoj i unapređenje turističke ponude Federacije BiH, kantona i jedinica lokalne samouprave u skladu sa zakonom koji reguliše oblast turizma,

b) nabavku promotivnog materijala, odnosno davanja informacija i obavljanja propagandnih djelatnosti kojim se promoviraju turističke vrijednosti jedinice lokalne samouprave, kantona odnosno Federacije BiH,

c) postavljanje i održavanje turističke signalizacije.

- (2) Turističke zajednice uspostavljene u skladu sa propisima iz oblasti turizma obavezne su sredstva boravišne takse koristiti samo za svrhu utvrđenu stavom (1) ovog člana.
- (3) Sredstva prikupljena po osnovu boravišne takse ne mogu se koristiti za finansiranje troškova materijalnog poslovanja turističkih organizacija uspostavljenih u skladu sa propisima iz oblasti turizma niti za isplatu plata i ostalih naknada zaposlenima u turističkim zajednicama.
- (4) Turističke zajednice obavezne su u godišnjem izvještaju o poslovanju kojeg podnose osnivaču posebno iskazati visinu sredstava prikupljenih po osnovu boravišne takse i svrhu trošenja tih sredstava.
- (5) Ukoliko se utvrdi da su korisnici sredstava nenamjenski utrošili sredstva boravišne takse obavezni su da izvrše povrat sredstava u budžet Federacije BiH, kantona i jedinice lokalne samouprave.

### **Član 13. (Napлата boravišne takse)**

- (1) Naplatu boravišne takse vrše ugostitelji koji pružaju usluge smještaja iz člana 3. ovog zakona (u daljem tekstu: davalac usluga).
- (2) Davalac usluga naplaćuje boravišnu taksu istovremeno sa naplatom usluge smještaja.
- (3) Ako davalac usluga ne naplati boravišnu taksu, dužan je da na svoj teret uplati iznos nenaplaćene boravišne takse.

### **Član 14. (Evidencija o uplatama)**

- (1) Davalac usluga je dužan da u računu za usluge smještaja posebno iskaže iznos boravišne takse i u slučajevima iz članova 5. i 6. ovog zakona da navede osnovicu oslobođanja od plaćanja boravišne takse, odnosno plaćanje u umanjenom iznosu, te dokaze o tome čuva do isteka sljedeće kalendarske godine.
- (2) Davalac usluga obavezno vodi evidenciju o uplaćenju boravišnoj taksi u posebnoj knjizi.
- (3) Ministar donosi Pravilnik o sadržaju i načinu vođenja knjige o evidenciji uplaćene boravišne takse.

### **Član 15. (Uplata boravišne takse)**

- (1) Davalac usluga je dužan da federalnoj tržišnoj, turističko-ugostiteljskoj inspekciji, kantonalnoj tržišnoj, turističko-ugostiteljskoj inspekciji i nadležnoj turističkoj zajednici do 15-tog u mjesecu za prethodni mjesec dostavi prijavu o broju korisnika usluga

smještaja i iznosu naplaćene boravišne takse, osim u slučajevima iz člana 10. stav (3) ovog zakona.

- (2) Podatke iz stava (1) ovog člana davalac usluga, dostavlja na posebnoj prijavi.
- (3) Ministar pravilnikom propisuje oblik i sadržaj prijave za uplatu boravišne takse.
- (4) Ugostitelj koji pruža usluge smještaja iz člana 3. ovog zakona obavezan je da federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici dostavi prijavu o iznosu obračunatog paušalnog iznosa boravišne takse do 15. februara tekuće godine, kao i da izvrši uplatu obračunatog paušalnog iznosa boravišne takse do 31. marta tekuće godine.
- (5) Ukoliko obveznik iz člana 10. stav (3) ovog zakona otpočne sa obavljanjem ugostiteljske djelatnosti od 1. januara do 30. juna tekuće godine, obavezan je da federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici dostavi prijavu o iznosu obračunatog paušalnog iznosa boravišne takse i da izvrši uplatu punog iznosa godišnjeg paušalnog iznosa boravišne takse najkasnije 60 dana nakon registracije ugostiteljskog objekta.
- (6) Ukoliko obveznik iz člana 10. stav (3) ovog zakona otpočne sa obavljanjem ugostiteljske djelatnosti od 1. jula do 31. decembra tekuće godine, obavezan je da federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici dostavi prijavu o iznosu obračunatog paušalnog iznosa boravišne takse i izvrši uplatu polovine od punog iznosa godišnjeg paušalnog iznosa boravišne takse najkasnije 60 dana nakon registracije ugostiteljskog objekta.
- (7) Po okončanju postupka registracije ugostiteljske djelatnosti za ugostitelja iz st. (5) i (6) ovog člana u pogledu rokova za podnošenje prijave o iznosu obračunatog paušalnog iznosa boravišne takse i roka uplate sredstava primjenjuje se odredba iz stava (4) ovog člana.
- (8) U slučaju da ugostitelj iz člana 10. stav (3) ovog zakona posluje sezonski obavezan je da plati polovinu godišnjeg paušalnog iznosa, te da federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici dostavi prijavu o iznosu obračunatog paušalnog iznosa boravišne takse i da izvrši uplatu paušalnog iznosa boravišne takse najkasnije 60 dana nakon početka sezone.
- (9) Ministar donosi Pravilnik kojim se propisuje oblik i sadržaj prijave o iznosu obračunatog paušalnog iznosa boravišne takse iz st. (4), (5) i (6) ovog člana.

#### **Član 16.** **(Rok za plaćanje boravišne takse)**

- (1) Prikupljena sredstva od naplaćene boravišne takse davalac usluga uplaćuje u roku od pet dana po isteku mjeseca u kojem je izvršena prijava iz člana 15. stav (1) ovog zakona na račun javnih prihoda Federacije BiH, kantona i jedinice lokalne samouprave osim u slučaju plaćanja paušalnog iznosa boravišne takse iz člana 10. stav (3) i člana 15. st. (4), (5), (6), (7) i (8) ovog zakona.

- (2) Izuzetno od stava (1) ovog člana, davalac usluga koji naplatu boravišne takse obavlja s naplatom usluge pružene na osnovu ugovora sa turističkom agencijom, iznos boravišne takse uplaćuje tri dana nakon naplate računa za pruženu uslugu, a najkasnije u roku od 60 dana od posljednjeg dana boravka osobe u njegovom smještajnom objektu.
- (3) Ministar donosi Pravilnik o načinu naplate boravišne takse.

## **V – UPRAVNI NADZOR**

### **Član 17.**

#### **(Nadzor nad namjenskim trošenjem sredstava)**

- (1) Nadzor nad namjenskim trošenjem sredstava iz člana 11. stav (1) tačka a) i b) ovog člana vrše općinski ili gradski i kantonalni tržišni, turističko-ugostiteljski inspektori, najmanje jednom godišnje, a najkasnije do 31.3. tekuće godine za prethodnu godinu.
- (2) Nadzor nad namjenskim trošenjem sredstava iz člana 11. stav (1) tačka c) ovog zakona vrše federalni tržišni, turističko-ugostiteljski inspektori, najmanje jednom godišnje, a najkasnije do 31.3. tekuće godine za prethodnu godinu.
- (3) U postupku vršenja nadzora organi iz st. (1) i (2) ovog člana mogu zahtijevati izvještaje, podatke, materijale, račune, informacije i druga obavještenja od turističkih zajednica.
- (4) Turističke zajednice uspostavljene u skladu sa propisima koji regulišu oblast turizma obavezne su omogućiti organima iz st. (1) i (2) ovog člana provođenje nadzora, kao i dostaviti potpune i tačne izvještaje i podatke kojima se dokazuje namjensko trošenje sredstava javnih prihoda.
- (5) Ukoliko u postupku nadzora organi iz st. (1) i (2) ovog člana utvrde nepravilnosti u pogledu trošenja sredstava boravišne takse, poduzet će mjere u svrhu otklanjanja uočenih nepravilnosti, a naročito:
  - a) odrediti mjere koje se moraju poduzeti radi otklanjanja utvrđenih nepravilnosti i odrediti rok za njihovo otklanjanje,
  - b) naložiti pokretanje postupka za utvrđivanje odgovornosti lica u odgovarajućoj turističkoj zajednici ukoliko prihode od boravišne takse ne koriste u skladu sa zakonom.
- (6) Nadzor nad primjenom članova 8. - 11. ovog zakona obavljaju nadležni organi jedinice lokalne samouprave, kantona i Ministarstvo.
- (7) Ministarstvo će dostaviti izvještaj Vladi Federacije BiH o provedenom nadzoru i načinu trošenja sredstava iz člana 11. stav (1) tačka c) ovog zakona.
- (8) Izvještaj o obavljenom nadzoru iz st. (1) i (2) ovog člana i rezultatima nadzora, nadležni organ i ministarstvo je dužno učiniti dostupnim javnosti objavom na web stranicama, najkasnije 30 dana nakon obavljenog nadzora.



**Član 18.**  
**(Inspekcijski nadzor)**

- (1) Inspekcijski nadzor nad primjenom ovog zakona obavljaju federalna uprava za inspekcijske poslove putem federalnih tržišnih, turističko-ugostiteljska inspektora, kantonalna uprava za inspekcijske poslove putem kantonalnih tržišnih, turističko-ugostiteljska inspektora, svaka u okviru svoje nadležnosti utvrđene ovim zakonom.
- (2) Inspekcijski nadzor u pogledu evidencije, obračuna, uplate i naplate boravišne takse u ugostiteljskim objektima za smještaj vrše federalni i kantonalni tržišni, turističko-ugostiteljski inspektori.

**Član 19.**  
**(Nadzor nad kontrolom naplate - uplate boravišne takse)**

- (1) Nadzor nad kontrolom naplate - uplate boravišne takse vrši federalna tržišna, turističko-ugostiteljska inspekcija i kantonalna tržišna, turističko-ugostiteljska inspekcija, a prinudna naplata se vrši na način i po postupku za naplatu javnih prihoda.
- (2) Nadzor nad kontrolom naplate i uplate boravišne takse vrši kantonalna tržišna, turističko-ugostiteljska inspekcija za objekte kategorizirane do tri zvjezdice a za objekte kategorizirane sa 4 i 5 zvjezdica vrši federalna tržišna, turističko-ugostiteljska inspekcija.
- (3) Ministar donosi Pravilnik o postupku prinudne naplate boravišne takse.

**Član 20.**  
**(Prava i dužnosti inspektora)**

- (1) U vršenju inspekcijskog nadzora, federalni i kantonalni tržišni, turističko-ugostiteljski inspektor pored opštih ovlaštenja propisanih posebnim zakonima iz oblasti inspekcijskog nadzora i upravnog postupka, imaju pravo i dužnost da:
  - a) vrši provjeru načina vođenja knjige gostiju davaoca usluga,
  - b) vrši provjeru ažurnosti i urednosti vođenja knjige gostiju davaoca usluga,
  - c) pregleda prostorije davaoca usluga radi utvrđivanja stvarnog broja gostiju i tačnosti podataka upisanih u knjigu gostiju,
  - d) pregleda ugovore, evidencije, isprave i drugu dokumentaciju potrebnu za utvrđivanje broja prijavljenih gostiju u slučajevima organizacije grupnih aranžmana,
  - e) vrši i druge poslove u skladu sa zakonom i drugim propisima.
- (2) Federalni tržišni, turističko-ugostiteljski inspektor i kantonalni tržišni, turističko-ugostiteljski inspektor, po izvršenom inspekcijskom nadzoru za subjekte nadzora koji nisu izvršili obračun i uplatu boravišne takse dužan je donijeti rješenje o naplati boravišne takse i odrediti rok uplate iste.
- (3) Žalba na rješenje iz stava (2) ovog člana ne odlaže izvršenje rješenja.
- (4) Ako subjekt nadzora ne izvrši uplatu boravišne takse u utvrđenom roku federalni tržišni, turističko-ugostiteljski inspektor i kantonalni tržišni, turističko-ugostiteljski inspektor je ovlašten i dužan privremeno zatvoriti objekat do otklanjanja nepravilnosti.

## **VI – KAZNENE ODREDBE**

### **Član 21.**

- (1) Novčanom kaznom od 4.000 KM do 20.000 KM kaznit će se za prekršaj davalac usluga organiziran kao pravno lice ako:
  - a) Naplati boravišnu taksu u većem iznosu od propisanog (čl. 8. i 9.),
  - b) Na račun javnih prihoda ne uplati boravišnu taksu u skladu sa članom 16. stav (1) ovog zakona, odnosno ako sredstva boravišne takse ne uplati u roku od tri dana nakon naplate računa, najkasnije u roku od 60 dana po pruženoj usluzi iz člana 16. stav (2) ovog zakona.
- (2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 1.000 KM do 5.000 KM.
- (3) Za prekršaj iz stava (1) ovog člana kaznit će se davalac usluga organiziran kao fizičko lice novčanom kaznom od 2.000 KM do 10.000 KM.

### **Član 22.**

- (1) Novčanom kaznom od 1.000 KM do 5.000 KM kaznit će se za prekršaj davalac usluga, odnosno ugostitelj organiziran kao pravno lice ako pruža usluge smještaja u kući za odmor, apartmanu i sobi za iznajmljivanje, iznajmljivač, seosko domaćinstvo i planinarski dom a ne uplati paušalni iznos boravišne takse na račun javnih prihoda iz člana 10. i člana 15. stav (8) ovog zakona.
- (2) Novčanom kaznom od 800 KM do 4.000 KM kaznit će se za prekršaj davalac usluga, odnosno ugostitelj organiziran kao pravno lice ako pruža usluge smještaja u kući za odmor, apartmanu i sobi za iznajmljivanje, iznajmljivač, seosko domaćinstvo i planinarski dom, a u roku propisanim članom 15. st. (4), (5), (6) i (7) ovog zakona ne podnese prijavu federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici ne uplati paušalni iznos boravišne takse na račun javnih prihoda.
- (3) Novčanom kaznom od 500 KM do 2.000 KM kaznit će se za prekršaj davalac usluga, odnosno ugostitelj organiziran kao pravno lice ako pruža usluge smještaja u kući za odmor, apartmanu i sobi za iznajmljivanje, iznajmljivač, seosko domaćinstvo i planinarski dom a u prijavi ne naznači tačne podatke u pogledu broja kreveta (ležaja) iz člana 10. stav (3).
- (4) Za prekršaj iz st. (1) i (2) ovog člana kaznit će se ugostitelj organiziran kao fizičko lice koji pruža usluge smještaj u kući za odmor, apartmanu i sobi za iznajmljivanje, iznajmljivač, seosko domaćinstvo i planinarski dom novčanom kaznom od 500 KM do 2.500 KM.
- (5) Za prekršaj iz stava (3) ovog člana kaznit će se ugostitelj organiziran kao fizičko lice koji pruža usluge smještaj u kući za odmor, apartmanu i sobi za iznajmljivanje, iznajmljivač, seosko domaćinstvo i planinarski dom novčanom kaznom od 200 KM do 1.000 KM.

- (6) Za prekršaj iz st. (1) i (2) ovog člana kaznit će se odgovorno lice u pravnom licu novčanom kaznom od 300 KM do 1.500 KM, a za prekršaj iz stava (3) ovog člana novčanom kaznom od 150 KM do 750 KM.

### **Član 23.**

- (1) Novčanom kaznom od 1.000 KM do 5.000 KM kaznit će se za prekršaj davalac usluga organiziran kao pravno lice ako:
- a) naplati boravišnu taksu u različitom iznosu za domaće i strane državljane (član 4. stav (1)),
  - b) ne uplati iznos nenaplaćene boravišne takse (član 13. stav (3)).
- (2) Za prekršaj iz stava (1) ovog člana kaznit će se dogovorno lice u pravnom licu novčanom kaznom od 300 KM do 1.500 KM.
- (3) Za prekršaj iz stava (1) ovog člana kaznit će se za prekršaj davalac usluga kao fizičko lice novčanom kaznom od 500 KM do 2.500 KM.

### **Član 24.**

- (1) Novčanom kaznom od 600 KM do 3.000 KM kaznit će se za prekršaj davalac usluga organiziran kao pravno lice, ako:
- a) Prilikom obračuna boravišne takse postupi u suprotnosti sa čl. 5. i 6. ovog zakona,
  - b) U svakom pojedinačnom slučaju ne naplati boravišnu taksu istovremeno sa naplatom usluge noćenja u smještajnom objektu (član 13. stav (2)),
  - c) Iznos boravišne takse i oslobađenje od plaćanja takse posebno ne naznači u računu odnosno ako ne navede osnov za plaćanje boravišne takse u umanjenom iznosu i dokaze o tome ne čuva do isteka naredne kalendarske godine (član 14.).
- (2) Za prekršaj iz stava (1) ovog člana kaznit će se dogovorno lice u pravnom licu novčanom kaznom od 200 KM do 1.000 KM.
- (3) Za prekršaj iz stava (1) ovog člana kaznit će se za prekršaj fizičko lice novčanom kaznom od 300 KM do 1.500 KM.

### **Član 25.**

- (1) Novčanom kaznom od 1.000 KM do 5.000 KM kaznit će se za prekršaj davalac usluga organiziran kao pravno lice ako federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici do 15 u mjesecu za prethodni mjesec ne dostavi prijavu o broju korisnika usluga smještaja i iznosu naplaćene boravišne takse (član 15. stav (1)).
- (2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 500 KM do 2.500 KM.
- (3) Za prekršaj iz stava (1) ovog člana kaznit će se davalac usluga kao fizičko lice novčanom kaznom od 500 KM do 2.500 KM.

## **Član 26.**

- (1) Novčanom kaznom od 2.000 KM do 20.000 KM kaznit će se turistička zajednica, ako:
  - a) sredstva prikupljena po osnovu boravišne takse nenamjenski utroši (član 12. stav (2)),
  - b) sredstva boravišne takse utroši za finansiranje troškova materijalnog poslovanja, kao i za isplatu plata i ostalih naknada zaposlenima u turističkoj zajednici (član 12. stav (3)) i
  - c) u izvještaju o poslovanju posebno ne iskaže visinu sredstava prikupljenih po osnovu boravišne takse, kao i svrhu trošenja tih sredstava (član 12. stav (4)).
- (2) Za prekršaj iz stava (1) ovog člana kaznit će se odgovorno lice u turističkoj zajednici novčanom kaznom od 1.000 KM do 5.000 KM.
- (3) Novčanom kaznom od 2.000 KM do 20.000 KM kaznit će se odgovorno lice u jedinici lokalne samouprave, kantona i Federacije BiH ako ne raspodijeli i odredi račun posebnih namjena na koji će se raspoređivati sredstva boravišne takse (član 11).

## **Član 27.**

### **(Zaštitne mjere)**

Za prekršaj iz čl. 21. i 22. ovog zakona koji su ponovljeno učinjeni od strane istog davaoca usluga, u roku od dvije godine od dana pravosnažnog rješenja o prekršaju, pored novčane kazne izreći će se i zaštitna mjera zabrane obavljanja ugostiteljske djelatnosti u tom objektu u trajanju od tri do šest mjeseci.

## **VII – PRIJELAZNE I ZAVRŠNE ODREDBE**

## **Član 28.**

### **(Podzakonski akti)**

Ministar će u roku od šest (6) mjeseci od dana stupanja na snagu ovog zakona donijeti sljedeća podzakonska akta:

- a) Pravilnik o sadržaju i načinu vođenja knjige o evidenciji uplaćene boravišne takse (član 14. stav (3)),
- b) Pravilnik o obliku i sadržaju prijave za uplatu boravišne takse (član 15. stav (3)),
- c) Pravilnik kojim se propisuje oblik i sadržaj prijave o iznosu obračunatog paušalnog iznosa boravišne takse (član 15. stav (9) ovog člana).
- (d) Pravilnik o načinu naplate boravišne takse iz člana 16. stav (3) ovog zakona.
- (e) Pravilnik o postupku prinudne naplate boravišne takse iz člana 19. stav (3) ovog zakona.

**Član 29.**  
**(Započeti postupci)**

Dugovanja po osnovu neplaćene boravišne takse i postupak prinudne naplate voditi će se i dovršiti po odredbama ovog zakona i važećih poreskih propisa.

**Član 30.**  
**(Zabrana diskriminacije)**

- (1) U postupcima propisanim ovim zakonom i propisima donesenim na osnovu ovog zakona, promovira se princip jednakih šansi te se zabranjuje svaki oblik diskriminacije, nasilja i uznemiravanja na osnovu spola, rodnog identiteta, seksualne orijentacije, spolne karakteristike, jezika, nacionalne pripadnosti, vjeroispovijesti, socijalnog porijekla, obrazovanja, imovnog stanja, političkog ili drugog uvjerenja, odnosno osnova.
- (2) Gramatički izrazi upotrijebljeni u ovom zakonu za označavanje muškog ili ženskog roda podrazumijevaju oba spola, osim kada je svrha ovog zakona drugačija.

**Član 31.**  
**(Prestanak važenja)**

Presudom Ustavnog suda Federacije Bosne i Hercegovine broj: U-34/13 od 3.7.2014. godine („Službene novine Federacije BiH“, broj 64/14) prestao je da važi Zakon o turističkim zajednicama i unapređenju turizma u Federaciji Bosne i Hercegovine („Službene novine Federacije BiH“, br. 19/96 i 28/03) kao i Uredba o boravišnoj taksi („Službene novine Federacije BiH“, broj 18/09) proizašla iz tog Zakona.

**Član 32.**  
**(Primjena ranijih propisa)**

- (1) Presudom Ustavnog suda Federacije Bosne i Hercegovine broj: U-34/13 od 3.7.2014. godine („Službene novine Federacije BiH“, broj 64/14) prestala je primjena Zakona o turističkim zajednicama i unapređenju turizma u Federaciji Bosne i Hercegovine („Službene novine Federacije BiH“, br. 19/96 i 28/03) kao i Uredbe o boravišnoj taksi („Službene novine Federacije BiH“, broj 18/09) proizašla iz tog Zakona.
- (2) Do donošenja zakona i podzakonskih akata utvrđenih ovim zakonom primjenjivati će se propisi doneseni na osnovu kantonalnih propisa iz oblasti turizma.

**Član 33.**  
**(Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**OBRAZLOŽENJE  
PRIJEDLOGA ZAKONA O BORAVIŠNOJ TAKSI  
FEDERACIJE BOSNE I HERCEGOVINE**

**I - USTAVNI OSNOV ZA DONOŠENJE ZAKONA**

Ustavni osnov za donošenje ovog Zakona sadržan je u članu III 1. tačka b) Ustava Federacije, zamijenjenog Amandmanom VIII, promijenjenog Amandmanom LXXXIX i Amandmanom CVI na Ustav Federacije Bosne i Hercegovine, prema kojima je u isključivoj nadležnosti Federacije donošenje propisa o finansijama i fiskalnoj politici Federacije, te u odredbi člana III. 2. tačka (f) Ustav Federacije, promijenjenog Amandmanom IX, prema kojem su federalna vlast i kantoni mjerodavni za turizam.

**II - RAZLOZI ZA DONOŠENJE ZAKONA**

Na osnovu člana 19. stav (1) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06) i člana 53. stav (3) Zakona o turističkim zajednicama i unapređenju turizma u Federaciji Bosne i Hercegovine ("Službene novine Federacije BiH", br. 19/96 i 28/03), Vlada Federacije Bosne i Hercegovine, na 94. sjednici održanoj 12. marta 2009. godine, na prijedlog Federalnog ministarstva okoliša i turizma, donijela je Uredbu o boravišnoj taksi („Službene novine Federacije BiH“, broj 18/09). Imajući u vidu da je Zakon o turističkim zajednicama i unapređenju turizma u Federaciji Bosne i Hercegovine proglašen neustavnim presudom Ustavnog suda Federacije Bosne i Hercegovine broj: U- 34/13 od 3.07.2014. godine, to je Federalno ministarstvo okoliša i turizma kao obrađivač Nacrta zakona, poduzelo aktivnosti na izradi novog zakona, poštujući odredbe Ustava Federacije Bosne i Hercegovine u pogledu nadležnosti Federacije i kantona u oblasti turizma.

Budući da ovaj Prijedlog Zakona predstavlja izraz fiskalne i ekonomske politike u turizmu, to se obrađivač pri donošenju istog rukovodio odredbama člana III 1. tačka b) Ustava Federacije, zamijenjenog Amandmanom VIII, promijenjenog Amandmanom LXXXIX i Amandmanom CVI na Ustav Federacije Bosne i Hercegovine, prema kojima je u isključivoj nadležnosti Federacije donošenje propisa o finansijama i fiskalnoj politici Federacije, člana III 1. Ustava Federacije Bosne i Hercegovine Amandman VIII, prema kojem Federacija Bosne i Hercegovine ima isključivu nadležnost za utvrđivanje ekonomske politike (član III 1. tačka c)), odnosno fiskalnu politiku (član III 1. tačka d)). Članom III. 2. (f) Ustava Federacije, promijenjenog Amandmanom IX, prema kojem su federalna vlast i kantoni mjerodavni za turizam, propisano je da su pored ostalih nadležnosti Federacije, i kantoni nadležni za uređivanje oblasti turizma. Prema odredbama člana 2. i člana 3. Poglavlja III. Ustava Federacije Bosne i Hercegovine, predviđena je nadležnost federalne vlasti i kantona u oblasti turizma, s tim da:

- Federalna vlast ima pravo utvrđivati politiku i donositi zakone koji se tiču ove nadležnosti (član III 3. stav 3);
- Kantoni imaju pravo utvrđivati politiku i provoditi zakone (član III 3. stav 4.);
- Saglasno potrebama nadležnosti u oblasti turizma ostvaruju se od strane kantona koordinirano od federalne vlasti (član III 3. stav 1), pri čemu federalna vlast uzima u

obzir različite situacije u pojedinim kantonima i potrebu za fleksibilnošću u provođenju (član III 3. stav 3).

Vlada Federacije je stanovišta da će nova zakonska rješenja, predložena u Prijedlogu ovog zakona, u značajnoj mjeri doprinijeti boljoj učinkovitosti sistema i boljoj koordinaciji i svrsishodnijem trošenju sredstava prikupljenih naplatom boravišne takse.

Imajući u vidu značaj turizma u ukupnom razvoju privrede Bosne i Hercegovine i promocije turizma kao bitnog segmenta u razvoju turističke djelatnosti, Federalno ministarstvo okoliša i turizma, kao obrađivač Nacrta Zakona je poduzelo aktivnosti na izradi Nacrta Zakona o turizmu Federacije BiH, kojim će biti propisana oblast turističkih zajednica i promociji turizma u Federaciji BiH, a umjesto Uredbe, pristupilo je izradi Nacrta Zakona o boravišnoj taksi Federacije BiH, u skladu sa utvrđenim ustavnim nadležnostima. Imajući u vidu činjenicu, da je Zakonom a ne Uredbom, regulisana boravišna taksa i u drugom BiH entitetu, time je, također ispoštovana i obaveza usklađivanja entitetskih propisa unutar Bosne i Hercegovine.

### **III – USKLAĐENOST PROPISA SA EVROPSKIM ZAKONODAVSTVOM**

Imajući u vidu da je pitanje regulisanja visine boravišne takse isključiva nadležnost domaćeg zakonodavstva, nije bilo potrebe za usklađivanjem s pravnom stečevinom EU. Međutim, prihvatajući sugestiju Ureda za zakonodavstvo i usklađenost sa propisima EU predlagač je postupio u skladu sa članom 4. Uredbe o postupku usklađivanja zakonodavstva Federacije Bosne i Hercegovine sa pravnom stečevinom Evropske unije („Službene novine Federacije BiH“, broj 98/16).

### **IV – PROVEDBENI MEHANIZMI I NAČIN OSIGURANJA PROVEDBE**

Prijedlog Zakona o boravišnoj taksi Federacije BiH sa predloženim zakonskim rješenjima ima za cilj da doprinese suzbijanju sive ekonomije i obezbijedi bolji priliv sredstava po osnovu prikupljanja boravišne takse, kao i da se uvede više discipline u ovu oblast. Ovim Prijedlogom Zakona jača se odgovornost obveznika u pogledu naplate boravišne takse naročito zbog obveznika koji ne uplaćuju boravišnu taksu i ne prijavljuju svoje goste. Analizirajući zemlje u regionu konstatovano je da se najviše sredstava od prikupljene boravišne takse raspoređuje na lokalnu zajednicu kao npr. Republika Hrvatska raspodjeljuje sredstva od boravišne takse u omjeru od 65% lokalnoj zajednici, 10% županiji, 25% nacionalnoj TZ, Srbija 100 % lokalnoj zajednici, Crna Gora 80% lokalnoj zajednici i 20% nacionalnoj TO, s obzirom da se u Prijedlogu Zakona raspodjele boravišne takse u najvećem procentu raspoređuje lokalnoj zajednici.

Prijedlogom Zakona o boravišnoj taksi Federacije BiH se uvode jedinice lokalne samouprave u raspodjelu finansijskih sredstava, slijedom odredbi Prijedloga Zakona o turizmu Federacije BiH, a koji predviđa mogućnost osnivanja općinskih odnosno gradskih turističkih zajednica.

Naglašavamo da se u ovom slučaju ne radi o prenošenju nadležnosti sa federalnog nivoa vlasti na nivo vlasti jedinica lokalne samouprave (niti je to moguće vršiti na ovaj način), nego samo o načinu raspodjele već prikupljenih sredstava, što predstavlja izraz fiskalne politike u oblasti turizma, za koju je isključivo nadležna Federacija BiH.

Prijedlogom Zakona su jasnije podijeljene nadležnosti federalnih i kantonalnih organa, kao i inspekcijski nadzor u okviru svojih nadležnosti i postupaka. Odredbe ovog Prijedloga Zakona su u potpunosti usaglašene sa Zakonom o prekršajima.

## **V – JAVNA RASPRAVA**

O Nacrtu Zakona o boravišnoj taksi Federacije BiH provedena je javna rasprava u trajanju od 60 dana, u skladu sa zaključcima oba doma Parlamenta Federacije BiH odnosno Zaključka Predstavničkog doma sa 17. redovne sjednice održane dana 25.01.2017. godine (Zaključak broj: 01-02-2255/16) i Zaključka Doma naroda sa 16. sjednice održane dana 26.01.2017. godine (Zaključak broj: 02-02-2255/16), te je na osnovu javnog i pismenog poziva provedena javna rasprava, o čemu je sačinjen izvještaj koji je dostavljen prilikom upućivanja Prijedloga Zakona u parlamentarnu proceduru još 2017. godine. Međutim, Vlada Federacije BiH je, aktom broj: 03-02-1141/2016, 03-02-991/2016 od 23.09.2019. godine, povukla iz parlamentarne procedure Prijedlog Zakona o boravišnoj taksi Federacije BiH, radi dorade.

U skladu s tim, obrađivač je pristupio postupku dorade Nacrta Zakona putem okruglih stolova kao oblika javnih konsultacija/rasprava koji su održani u Sarajevu, Mostaru i Bihaću na temu „Izazovi vezani za Zakon o turizmu Federacije BiH i Zakon o ugostiteljstvu Federacije BiH" koji su organizovani u saradnji s Privrednom/Gospodarskom komorom Federacije BiH i Projektom unapređenja poslovne klime i pristupa tržištima (ICAM), koji provodi Svjetska banka - Međunarodna finansijska korporacija – IFC.

Cilj okruglih stolova bio je da se objedine sugestije, primjedbe i prijedlozi privrednika iz sektora turizma i ugostiteljstva, pravnih i fizičkih lica (turistički vodiči, turističke agencije, hotelijeri i dr.) predstavnika turističkih zajednica, udruženja, te resornih nadležnih institucija za oblast turizma i ugostiteljstva vezano za postojeću zakonsku regulativu i predloženi Nacrt Zakona. Mišljenja nadležnih organa na Nacrt Zakona kao i Izvještaj/izjašnjenje predlagača na mišljenja nadležnih organa o prihvaćenim prijedlozima i mišljenjima kao i zašto pojedini prijedlozi i mišljenja nisu prihvaćena od strane predlagača sa Zaključcima sa održanih okruglih stolova kao vida javnih konsultacija na doradu Nacrta Zakona su u prilogu.

## **VI – EKONOMSKA OPRAVDANOST DONOŠENJA PROPISA**

Predviđenim rješenjima Vlada Federacije BiH će na godišnjem nivou, a po prijedlogu ministra utvrđivati jedinstven iznos boravišne takse. Rješenjima iz Prijedloga Zakona jača se fiskalna disciplina u samom sektoru. Predviđa se povezivanje registriranja poreznih obaveza s izmirenim i neizmirenim obavezama po osnovu uplaćivanja boravišne takse. Prijedlog Zakona predviđa i usvajanje podzakonskih akata koji se odnose na vrste i način uplate boravišne takse i raspodjele prihoda u ovoj oblasti.

## **VII - OBRAZLOŽENJE POJEDINIH ZAKONSKIH RJEŠENJA**

Ovim se Prijedlogom Zakona uređuje obaveza plaćanja boravišne takse, način utvrđivanja visine boravišne takse, obveznici plaćanja i uplate boravišne takse, način raspoređivanja i korišćenja finansijskih sredstava prikupljenih na osnovu uplate boravišne takse, način kontrole uplate boravišne takse, kao i ostala pitanja u vezi sa boravišnom taksom.



Član 1. - Definiše predmet zakona.

Član 2. - Definišu se pojmovi koji se koriste u zakonu i njihova značenja.

Članovi 3. i 4.- Regulišu obavezu domaćeg ili stranog državljanina koji koristi usluge noćenja u ugostiteljskom objektu za smještaj da se evidentira u knjigu gostiju i plaća boravišnu taksu po svakom ostvarenom noćenju u ugostiteljskom objektu za smještaj kao i da strani državljani plaćaju boravišnu taksu pod istim uslovima i u istom iznosu kao i domaći državljani.

Član 5. - Reguliše ko je oslobođen obaveze plaćanja boravišne takse.

Član 6. - Reguliše ko plaća boravišnu taksu umanjenu za 50 %.

Član 7.- Reguliše da lica iz čl. 5. i 6. ostvaruju pravo iz navedenih članova ako podnesu dokaz da su ispunjeni uslovi za neplaćanje boravišne takse ili plaćanje boravišne takse u umanjenom iznosu, i to: ličnu kartu, putnu ispravu, člansku kartu, potvrdu škole, odnosno obrazovne ustanove i druge slične isprave kojima se dokazuje ispunjenost uslova iz čl. 5. i 6. ovog zakona.

Član 8. i 9. – Definišu visinu boravišne takse te obavezu Vlade Federacije BiH da na godišnjem nivou utvrdi visinu boravišne takse po svakom ostvarenom noćenju i izuzetno, te mogućnost da se u ovisnosti od razvrstavanja jedinice lokalne samouprave kao turističkog mjesta, utvrdi i uvećan iznos boravišne takse.

Član 10. - Reguliše gdje se uplaćuju prikupljena sredstva po osnovu boravišne takse, ko je obveznik uplate, izuzetak kod paušalnog plaćanja iznosa boravišne takse, kao i da će obavezu plaćanja godišnjeg paušalnog iznosa boravišne takse na prijedlog Ministra utvrditi Vlada Federacije BiH u prvoj polovini tekuće godine za sljedeću godinu.

Član 11. - Reguliše raspoređivanje prikupljene boravišne takse između jedinice lokalne samouprave, kantona i Federacije BiH.

Član 12.- Reguliše obavezu turističkih zajednica da sredstva po osnovu prikupljene boravišne takse koriste isključivo za namjene utvrđene zakonom, kao i da u godišnjem izvještaju kojeg podnose osnivaču, iskažu visinu sredstava prikupljenih po osnovu boravišne takse i svrhu trošenja tih sredstava.

Član 13. - Reguliše ko vrši naplatu boravišne takse.

Članovi 14. i 15. - Regulišu obaveze davaoca usluga prema federalnoj tržišno, turističko-ugostiteljskoj inspekciji, kantonalnoj tržišno, turističko-ugostiteljskoj inspekciji i nadležnoj turističkoj zajednici sa rokovima i načinu izvršavanja obaveza, te da Ministar donosi Pravilnik o sadržaju i načinu vođenja knjige o evidenciji uplaćene boravišne takse, Pravilnik o obliku i sadržaju prijave za uplatu boravišne takse i Pravilnik kojim se propisuje oblik i sadržaj prijave o iznosu obračunatog paušalnog iznosa boravišne takse.

Član 16. - Reguliše rok davaocu usluga za uplatu naplaćene boravišne takse na račun javnih prihoda Federacije, kantona i jedinice lokalne samouprave.

Član 17. - Reguliše nadzor namjenskog trošenja sredstava, kada to obavlja nadležni organ jedinice lokalne samouprave, kantona a kada to obavlja Ministarstvo.

Član 18. - Reguliše inspekcijski nadzor nad primjenom ovog zakona, te nadležnost federalnih i kantonalnih tržišnih, turističko-ugostiteljskih inspektora u pogledu evidencije, obračuna, uplate i naplate boravišne takse.

Član 19. - Reguliše nadzor nad kontrolom naplate - uplate boravišne takse od strane federalne tržišno, turističko-ugostiteljske inspekcije i kantonalne tržišno, turističko-ugostiteljske inspekcije, a prinudna naplata se vrši na način i po postupku za naplatu javnih prihoda.

Član 20. - Reguliše posebna ovlaštenja federalnog i kantonalnog tržišno, turističko-ugostiteljskog inspektora da vrše provjeru načina vođenja knjige gostiju davaoca usluga, provjeru ažurnosti i urednosti vođenja knjige gostiju davaoca usluga, pregledaju prostorije davaoca usluga radi utvrđivanja stvarnog broja gostiju i tačnosti podataka upisanih u knjigu gostiju, pregledaju ugovore, evidencije, isprave i drugu dokumentaciju potrebnu za utvrđivanje broja prijavljenih gostiju u slučajevima organizacije grupnih aranžmana.

Članovima od 21. do 27. - Regulišu se prekršajne kazne pri čemu su početne kazne određene u većem iznosu i usklađene sa odredbama Zakona o prekršajima.

Član 28. - Reguliše obavezu i rokove za donošenje podzakonskih akata, Pravilnika o sadržaju i načinu vođenja knjige o evidenciji uplaćene boravišne takse i Pravilnika o obliku i sadržaju prijave za uplatu boravišne takse, Pravilnik kojim se propisuje oblik i sadržaj prijave o iznosu obračunatog paušalnog iznosa boravišne takse, Pravilnika o načinu naplate boravišne takse, te Pravilnik o postupku prinudne naplate boravišne takse.

Član 29. - Reguliše da dugovanja po osnovu neplaćene boravišne takse i postupak prinudne naplate će se voditi i dovršiti po odredbama ovog zakona i važećih poreskih propisa.

Član 30. – Reguliše zabranu diskriminacije.

Član 31. – Reguliše prestanak važenja ranijih propisa.

Član 32. – Reguliše primjenu ranijih propisa.

Član 33. - Reguliše stupanje na snagu zakona osmog dana od dana objavljivanja u „Službenim novinama Federacije BiH.“

Odredbe koje propisuju sadržaj završnog dijela propisa odnosno prestanak važenja propisa i primjenu ranijih propisa nalaze se u prijelaznim i završnim odredbama ovog Prijedloga Zakona, iako je presudom Ustavnog suda Federacije Bosne i Hercegovine broj: U-34/13 od 3.07.2014. godine, utvrđeno da Zakon o turističkim zajednicama i unapređenju turizma u Federaciji Bosne i Hercegovine („Službene novine Federacije BiH“, br. 19/06 i 28/03), nije u skladu sa Ustavom Federacije Bosne i Hercegovine. Navedeni propis bio je zakonski osnov i za podzakonske akte koji su bili u primjeni, a to su: Uredba o članarinama u turističkim zajednicama („Službene novine Federacije BiH“, br. 18/09 i 2/12) i Uredba o boravišnoj taksi („Službene novine Federacije BiH“, broj 18/09).

## **VIII – FINANSIJSKA SREDSTVA ZA PROVOĐENJE PROPISA**

Za provođenje ovog zakona nisu potrebna dodatna finansijska sredstva iz Budžeta Federacije Bosne i Hercegovine.